



Juvinal Dias.[Foto: Zinho MD | TAFARA.TL | 16.10.2017].

JUVINAL DIAS: OPOZISAUN DEVIA KOALIA KONABA VANTAJEN NO DESVANTAJEN VII GOVERNO

👤 JESUINO MARCAL DE JESUS 🕒 October 16, 2017 📁 SOSIAL & POLITIKA 👁 643 Views

Representante sociedade civil hatete plenaria apresentasaun VII Governo Konstitusional ne'e hetan deit apresiasaun politik, Deputadu sira la koalia vantajen no desvantajen programa nian. Ministru Adriano hatete opiniaun hosi opozisaun ne'e normal.

Iha apresentasaun durante oras 4 nia laran ne'e, hetan prezensa husi publiku liu liu husi sociedade civil Lao Hamutuk, Juvinal Dias, tuir nia observasaun ba plenaria ida ne'e la lao ho debate Programa maibe koalia deit konaba interese Politika.

“Partidu Opozisaun la konsege koalia konaba vantajen no desvantajen Programa Governu. Opozisaun so koalia deit konaba sira nia interese politiku, ne'e lalos. Opozisaun iha obrigasaun atu koalia konaba programa,” hateten Juvinal Dias.

Iha fatin hanesan Ministru na Presidencia de Conselho Ministro, Adriano do Nascimento ba Jornalsita [TAFARA.TL](https://tafara.tl) hateten katak opiniaun husi opozisaun ne'e normal.

“Partidu ida-idak iha nia opiniaun ba apresiasaun ne'e normal, depois mak ita hare'e tok iha votasaun sira atu halo saida, tamba mosaun autorizasaun ga afavor,” tenik Adriano.

Tuir observasaun husi Jornalista [TAFARA.TL](https://tafara.tl) nian katak iha plenaria ida ne'e lao ho hakmatek tamba hetan seguransa masimu husi PNTL no observador sira ne'ebe koopera diak tebes ba sesaun apresentasaun ida

ne'e.

Iha apresentasaun programa VII Governo Konstituisional ne'ebe lidera husi Primeiru Ministru remata ona iha sesaun meudia no sei kontinua iha sesaun loro-kraik.

Iha dokumentu programa VII konstituisional ho objetivu sira iha pilar hat ne'e,inklui ida mak Apoiu ba Ema Vulneravel Sira iha Dezenvolvimentu Sosiál, hadiak liutan sustentabilidade infraestrutur sira, nudar parte hosi Dezenvolvimentu Infraestrutur, hasa'e Rendimentu Liu Husi Kriasaun ba Empregu, iha Dezenvolvimentu Ekonómiku no Garantia ba Defeza, Seguransa no Estabilidade Nasionál ,no Modernizasaun Instituisional.

Programa VII governo ho vizaun *"Povu ka populasaun Timor-Leste nia qualidade moris aumenta di'ak liu tan, liu husi aumentu as liu tan sira nia qualidade saúde, qualidade edukasaun, aksesu ba enerjia no be mos, qualidade alimentasaun, habitasaun ne'ebé dignu, no ho nune'e populasaun ho sidadaun ida-idak sei moris iha kondisaun, situasaun no ambiente ne'ebé livre, dame, justu, aolidaria, toleransia, no seguru liu tan."*

Programa ne'e elabora bazeia ba komponente tolu; Ida, Konstituisaun husi programa no atividade VI Governu; Rua, PEDN 2011—2030, liliu implementasaun PEDN segunda faze (2016-2020) no ODS; Tolu, Komprimisio eleitoral partidu FRETILIN no PD, nomos fo konsiderasaun as ba preokupasaun husi partidu hirak ne'ebé iha asentu parlamentar hanesan Partidu CNRT, PLP no Partidu KHUNTO. [Jesuino Marcal de Jesus | TAFARA.TL | Editor: Ato 'Lekinawa' Costa | 16.10.2017].*

Oinsa ita nia sentimentu?



Powered by *React & Share*